

SERMO

**SERMONS SVR LE CANTIQVE DES CANTIQUES, DE Salomon. SERMON SVR LE
PREMIER CHAPITRE. Cantique des cantiques de Salomon. — SERMONS SVR LES
TROIS PREMIERS CHAPITRES DV CANTIQVE des Cantiques, de Salomon. PAR
THEODORE DE BEZE Ministre de la Parole de Dieu en l'Eglise de Geneue. Par Iehan
le Preux. M. D. LXXXVI.**

Théodore de Bèze

Transcription électronique

[Page titre]

SERMONS
SVR LES TROIS
PREMIERS CHAPITRES
DV CANTIQVE
des Cantiques , de
Salomon.

PAR THEODORE DE BEZE
Ministre de la Parole de
Dieu en l'Eglise de
Geneue.

Par Iehan le Preux.
M. D. LXXXVI.

1. SERMONS

SVR LE CANTIQVE

DES CANTIQUES, DE

Salomon.

[Page 1]

1.1. Priere avant le sermon.

Nostre ayde soit au nom de Dieu qui
a fait le ciel & la terre, Amen.

1.2. Exhortation.

Mes freres, qu'un chacun de vous se presente deuant
la face du Seigneur, avec confession de ses fautes
& pechez, suyuant de son cœur mes paroles.

1.3. Confession.

Seigneur Dieu, Pere Eternel & tout-puissant, nous
confessons & reconnissons sans feintise deuant ta
sainte Maiesté, que nous sommes poures pecheurs.
conceus & nais en iniquité & corruption, enclins à mal
faire, inutiles à tout bien, & que de nostre vice nous
transgressons sans fin & sans cesse tes saints commandemens :
enquoy faisant nous acquerons par ton iuste
iugement ruine & perdition sur nous. Toutesfois,
Seigneur, nous auons desplaisir en nous-memes de
t'auoir offensé, & condamnons nous & nos vices, avec
vraye repentance, desirâs que ta grace subuienne à nostre
calamité.

Vueilles donc auoir pitié de nous, Dieu & Pere tres-
benin & plein de misericorde, au nom de ton Fils Iesus
Christ nostre Seigneur. Et en effaçant nos vices &
macules, elargi nous & augmente de iour en iour les
graces de ton saint Esprit : afin que reconnissons de
tout nostre cœur nostre iniustice, nous soyons touchez
de desplaisir, qui engendre droite penitence en nous

[Page 2]

laquelle nous mortifiant à tous pechez, produise
fruits de iustice & innocence, qui te soyent agreables,
par iceluy Iesus Christ nostre Seigneur. Amen.

Icy se chante le Pseaume ordinaire, puis le
Ministre adiouste,

Nous inuoquerons nostre bon Dieu & Pere, le
supplians, comme toute plenitude de Sagesse gist
en lui, qu'il lui plaise nous illuminer par la grace de
son saint Esprit, pour auoir la vraye intelligence de
sa Sainte Parole, affin qu'elle ne soit point corrompue
par nostre sens & entendement charnel, mais que
nous estât fidelemēt exposee, & receue en noz cœurs
par vne vraye & viue foy, nous soyons aprins par icelle
de renoncer à nousmesmes, pour mettre pleinement
nostre fiance en lui, pour l'honorer & seruir comme
il appartient, lui rendâs la crainte & l'honneur que doiuent
vrais enfans à leur pere, & seruiteurs à leur Maistre,
puis qu'il lui a pleu nous faire cest hōneur de nous
aduouer au nombre de ses seruiteurs & enfans : ce que
nous lui demanderōs au nom & a la faueur de nostre
Seigneur Iesus Christ son Fils, ainsi qu'il lui a pleu nous
enseigner & commander de le prier, en disant 'Notre Pere qui es es cieux. Ton nom soit sanctifie. Ton regne
adiuene. Ta volonte soit faicte en la terre comme au Ciel. Donne-nous [aujourd'hui] nostre pain quotidien. Pardonne

nous noz offenses , comme nous pardonnons à ceux qui nous offensent. Et ne nous indui point en tentation, mais nous deliure du malin. Car à toy appartient le regne, la puissance & la gloire aux siecles des siecles. Amen'. Ce qui [Page 3]

Ce qui sensuit est escrit au tiltre du troisieme liure de Salomon.

1.4. Sermon svr le premier chapitre.

Câtique des Cantiques de Salomon.

Matières traictées en ce premier chapitre.

- 1 Que ce liure est Canonique, mais doit estre leu & exposé en l'Eglise avec grande discretion.
2. Que rien de contenu és saints liures ne doit estre tenu caché en l'Eglise: & pourquoy Dieu n'a tousiours parlé auûi clairement une fois que l'autre.
3. Pourquoy le S. Esprit a choisi & poursuiui si auant l'allegorie du Mariage, en ce Cantique & ailleurs.
4. Trois manieres de coniuñtiõ de Dieu avec sa creature. l'une generale, l'autre particuliere à la personne de Iesus Christ, la troisieme, du Fils de Dieu avec son Eglise.
5. Des personnes introduictes en ce Cantique, en façon de Dialogue, avec le sommaire & but d'iceluy.
6. Pourquoy ce Cantique est appellé Cantique des Cantiques , & qui en a esté l'escriuain.
7. Singuliere obseruatiõ sur l'ordre des trois liures de Salomon.
8. Exhortation à faire son profit de l'exposition de ce Cantique.

Ce liure tant en l'Eglise ancienne Israëlitique, que en la Chrestienne à tousiours esté tenu d'vn commun consentement non seulemēt du nombre des liures dictez par le S. Esprit , & qui doyuent estre la regle de nostre Foy: mais aussi specialement [Page 4]

comme l'vn des tresexcellents & plus spirituels : & toutesfois n'a pas esté manié ni leu en l'Eglise, cõme chacun des autres: mais a esté reserué pour estre proposé à ceux qui seroyent les plus auâces en la cognoissance de Dieu, & de iugement plus ferme. Premierement, pource qu'il est escrit d'vn style entierement allegorique & ænigmatique, cest à dire nous donne à entendre les choses spirituelles par similitude & figure prinse des choses naturelles & corporelles. ce qui n'est pas donné à tous ni de bien entendre de soymesmes, ni de bien comprendre tousiours par vn autre, pour en bien faire son profit. Secondement, pource que ceste Allegorie est entierement fondee sur la conionction de mariage, en laquelle considerée humainement dès le commencement iusqu'à la fin , il se trouue beaucoup de grâds defauts & imperfectiõs de la part des hõmes, ce qui est aduenu, depuis que le peché est entré au monde. Oultre cela on ne sait que trop combien le monde est de long temps adonné à toutes ces ordures & lasciuetés, qui sont autant de pollutions des caresses & chastes dilections maritales : esquelles combien qu'il y ait beaucoup de default, qu'il est bõ besoin que le Seigneur couure & suporte par sa grande bonté, toutefois cela n'êpesche pas que selõ le dire de l'Apost. Hebr. 13, 4. le mariage ne soit honorable entre tre

[Page 5]

tous, & la couche d'icelui sans macule. Voila pourquoy quelques vns considerans les malheurtés de ce mōde, & qu'en ce Cantique il y a plusieurs manieres de parler, selon que portoit la simplicité du temps auquel ce liure a esté escrit, desquelles il seroit aisé d'abuser, ont fait difficulté de l'interpreter en

l'Eglise, craignans qu'il ne s'en ensuyvist plus de desauantage que d'edification. Les autres passans bien plus auant, on esté si hardis ou plustost outrecuidés, que de vouloir rayer ce liure d'entre les escrits canoniques, comme estât du tout profane, & comme si Salomon l'auoit composé au milieu de ses desbordemens.

Quant aux premiers de ces deux, ils sont à louer, entant qu'ils ne trouuent pas bon que chacun se iette ni soit introduit temerairement au maniemēt de ce liure suyuant le dire de l'Apostre, 1. Cor.3,2. qu'il faut commencer par le lait pour venir finalement à la viande pure & solide: Ce qui a esté aussi songneusement obserué en ceste Eglise & ailleurs, par les fidelles Pasteurs: Mais quāt aux autres qui ont osé condamner ce liure, ils ne sont non plus à escouter que ceux qui se dressent directement contre le S. Esprit par vne arrogance du tout desmesuree: veu que non seulemēt de tout temps l'Eglise ancienne & nouvelle en a iugé tout autrement, ayant esté ce liure

[Page 6]

songneusement exposé par les anciens docteurs Grecs & Latins: voire mesmes traicté & manié comme du tout contemplatif, és monasteres entre les moines, plus qu'aucun autre liure, quoy qu'ils fissent deslors profession d'estre esloğnez de toute pensee de femme & de mariage. Dauantage ceste mesme Allegorie du mariage est poursuyuie bien amplement & a mesme fin es autres liures tenus pour diuins & sacrés d'vn commun consentement perpetuel, comme au Pseaume 45, qui est comme vn sommaire de tout ce Cantique, & en Esa.62.1. & 6. Ierem. cha.3 Ezech.16 & 23. Osee1. & 2. Matth.25. & Ieh.3.29. Rom.7.1,2 Cor.II, 2. & sur tout Ephes. 5. ou il vse des mesmes mots que Adam en la premiere institution du mariage: ascauoir, que l'Eglise est faite Chair de la chair de Iesus Christ, & os de ses os, ce qui est, dit il, vn grand secret: Bref le S. Esprit en l'Apocalypse 17. est l'expositeur du commencement de ce liure: Et ne se faut non plus arrester à ce que quelques vns disent pour se persuader que ce liure ne soit canonique, ascauoir, Que nul passage d'iceluy n'est allegué au Nouveau Testamēt. Car, premierelement oultre ce que i'ay dit du 45. Pseaume qui est le sommaire de ce liure, les similitudes prises du mariage en S. Paul, & en l'Apocalypse dernier chapitre en sont puisees, &

[Page 7]

& faudroit par mesme raison condāner d'autres liures du Viel testament, receus sans contredict.

2 Il faut donc tenir vn moyen en l'exposition de ce liure, le traitant ou & ainsi qu'il appartient en l'Eglise de Dieu, en laquelle Dieu ne veut estre tenu caché, ni tellement secret rien de ce qu'il nous enseigne par les Prophetes & Apostres, qu'on se contente de le voir enregistré, sans regarder &

cōsiderer que cest:ainsi que les payès ont fait de leurs fausses religions, craignās que leurs abus fussent decouuerts, si on sçauoit leurs mysteres : & comme nous voyons encores auiourd'hui qu'il se pratique en la faulse Eglise, en laquelle on defend la lecture des saintes Escritures en langue vulgaire:au lieu que les Prophetes & Apostres dès le commencement du monde ont parlé & escrit en langage commun & intelligible à tous, pour estre entendus de tous.Bien est vray cependāt que le S. Esprit n'a pas vsé d'vn mesme style par tout , mais à parlé quelquefois tout clairement, & quelquefois obscurement, en telle sorte toutesfois (comme quelqu'vn des Anciens à pieça remarqué) que l'obscurité est attrempee de la clarté:afin d'aiguiser le desir de s'enquerir de ce qu'on n'entend pas du premier coup,& pour nous mieux faire priser les secrets de sa sapience,apres qu'il nous

[Page 8]

a donné le don de science & d'intelligence par vne songneuse diligence en la lecture & conference des passages des escritures. C'est ce que nous esperons faire , moyennant la grace de Dieu obtenuë par vos prieres , en l'exposition de ce liure:attendu qu'ily a desia enuiron cinquante ans que Dieu a de nouveau comme remis sus son lubilé , & fait reluire sa sainte lumiere en ce lieu , tellement que rien ne nous doit estre nouveau en tel cas, comme si nous estions encores petits enfans de sens,au lieu que ce nous doit estre vne grād honte,si nous ne sommes du nombre de ceux desquels il est parlé Heb.5. ascauoir, qu'ils sont exercés à discerner le bien & le mal.

3 AV reste pour l'intelligence de ce liure, il est requis de scauoir qui a meū le S. Esprit de choisir & poursuyure si auant ceste similitude du mariage,lequel n'est pas,comme i'ay dit,sans grandes imperfections,si le Seigneur vouloit prendre les choses à la rigueur. C'est en somme,d'autant qu'il ne se trouue entre les hommes aucune liaison si Diuine quant à l'obligation,ny si estroicte & ferme quant à l'effect,que le mariage. Car en tous autres traités & contracts par lesquels les vns s'obligent aux autres,il est question des biens de ce monde & qui sont hors des personnes: ou s'il est questiō du corps, l'obligation n'est point

[Page 9]

point reciproque, ains autant au desauātage de l'vn , qu'a l'auantage de l'autre : mais au Traité de mariage,premieremēt le Seigneur y entreuient comme principal autheur de sorte que ce lien est indissoluble si Dieu luy mesmes ne parle, rompant le liē par la mort ou autre sienne ordonnance. Et puis l'obligation des personnes est si reciproque , que pas vne des deux parties n'est à soymesme,& toutes les deux deuiennent comme vne seule personne par la conionction maritale.Qui plus est l'effect en est plustost diuin qu'humain ,

ascauoir la generation des hommes,
 comme par maniere de dire, Dieu par ce contract
 se [seruant] des hommes ainsi que d'instrumens
 à faire ce qui luy est propre , ascauoir
 a faire engèdrer des hommes , desquels
 son Eglise est composee. Car combien que
 ceste ordonnance de Dieu , Croissez & multipliez,
 s'estende generalement a tous animaux.
 y estans les hommes compris: si est-ce
 qu'ainsi que la creatiō de l'homme , & quant
 au masle & quant à la femelle, est toute aultre
 que celle des aultres animaux, aussi fault il
 [conclurre] que Dieu conduit & amene à son
 effect la suite du genre humain de pere en
 fils, d'une façon speciale & particuliere par la
 conionction maritale , ordonnee & beniste
 specialement par l'inspiration de son Esprit
 & inuocation de son nom.

[Page 10]

Le [S.Esprit] donc nous voulant représenter
 ce qui nous est de soy-mêmes incompréhensible,
 ascauoir, la tresetroite liaison spirituelle
 de Iesus Christ avec l'ame fidelle,
 pour engendrer en l'esprit des croyans, (desquels
 l'assemblée s'appelle } l'Eglise) la cognoissance
 de verité avec tous bōs & saints mouuements
 & effects , pour viuifier puis apres
 chascun fidelle tout entier, & par cōsequent
 toute ceste Eglise, & assemblée en la vraye
 vie eternelle , n'a peu choisir vne similitude
 plus propre ni vn plus vif patron & modele
 de ceste conionction.

C'est la raison aussi pour laquelle sa parole
 receüe & fructifiante par Foy est par S.Pierre
 appelee semence incorruptible. A cela tēd
 aussi ceste seconde generation qui se fait par
 l'esprit , de laquelle parle amplement nostre
 Seigneur Iesus Christ avec Nicodeme Ieh.3.
 Ce que ie veux bien encore vous declarer &
 deduire plus amplement, comme estant ce secret
 le fondement de nostre salut.

4. Chacun donc est contraint de confesser
 que tout bien vient de Dieu , soit que nous
 considerions l'essence que toutes creatures
 ont receue de Dieu, soit que nous ayons esgard
 aux diuerses qualitez & entretenement
 d'icelles: Cela nous est signifié par l'Apostre
 Act.17. disant, qu'en Dieu nous sommes, &
 auons mouuement, & viuons, comme si par maniere

[Page 11]

maniere de dire , Dieu le Createur s'insinuoit
 dedans ses creatures, pour nous mieux
 monstrer ceste vertu & efficace diuine qui
 se desploye en icelles, selon la mesure & duree
 qu'il lui plaist : combien qu'a parler proprement ,
 son essence diuine ne soit dedans
 ni dehors le monde , mais comprenne tout
 incompréhensiblement. Mais il y a deux autres
 manieres de conionctions de Dieu voire
 d'vnions avec l'homme , bien differentes
 de celle dont nous venons de parler, & d'vn
 effect d'autre consequence : ascauoir en premier
 lieu, celle de l'Eternel fils de Dieu avec
 vn vray corps & vne vraye ame humaine au

ventre de la tresheureuse vierge Marie , par vnion personnelle, incomprehensible aux Anges mesmes,par laquelle,la Parole qui est le fils eternel & coessential du Pere , à esté faite chair, Ieh.1,14.de sorte que des lors ceste personne qui est appelee Iesus Christ , Matth. 1,16.est vray Dieu & vray homme,sans separation ni confusion aucune des deux natures, qui est ce grand secret duquel parle

l'Apostre 1.Tim 3. Et de ceste ci depend vne troiesme [conionction] de nostre Immanuel avec les croyans,par laquelle toute personne fidelle , & par consequent toute l'Eglise qui en est composee, est spirituellement comme mariee avec Iesus Christ, & faite chair de sa chair & os de ses os : non pas que le corps de

[Page 12]

Iesus Christ soit reellemēt dans nostre corps, ou son ame dans nostre ame (ce que ne peut porter la verité de la substance de son corps ny de son ame, comme aussi telle cōionction n'appartiēt aucunemēt à ce mystere du tout spirituel & tendant à vne vie spirituelle)mais dautāt qu'ainsi qu'vn corps humain,l'ame y estant naturellemēt coniointe , viuifie tous les mēbres de ce corps , pourueu qu'ils soyēt liez & conioints ensemble selon la structure du corps: ainsi Iesus Christ , comme espoux spirituel de son Eglise , par la force de son S. Esprit,& par le moyen de sa nature humaine, selō laquelle il symbolize avec nous , se ioint de si pres & si puissamment à nous , moyennant la foy qui l'apprehende,qu'ils nous viuifie à vie eternelle , besongnant en nostre entendement & volenté,pour y reparer peu à peu l'image de Dieu effacee par le peché,pour finalement nous faire participās en perfection de son immortalité glorieuse , au dernier iour, auquel est reseruee la consummatiō de ce saint & spirituel mariage. C'est de là que l'Apostre a puisé ces manieres de parler qu'il a apprises de Iesus Christ mesmes , asçauoir , que nous sommes en Iesus Christ , Rom.8,1. & que Iesus Christ est en nous:Rom.8,10. qu'il vit en nous,& nous en luy:Gal.2,20. & qu'il habite en ses saints Ieh.14, 23.comme aussi à mesme fin Iesus Christ se compare à vn

[Page 13]

vn sep, & nous aux sermens fructifians:Ieh.15. & son corps est appellé nostre viande, & son sang nostre bruuage Ieh.6. [d'autant] qu'ainsi que corporellement par le manger & le boire ceste vie presente est conseruee en nous, ainsi c'est d'vn seul Iesus Christ s'insinuant en nous,en la maniere que j'ay dicte, & par maniere de dire receu mangé & digeré par la Foy de l'homme interieur,que nous tirons la vraye vie eternelle. En l'expositiō de ce liure donques, il n'est pas question d'apporter vn esprit sensuel , mais il faut qu'avec Salomon nostre ame conçoÿue ce mari & ce mariage, & tout ce qui en est dit, d'vne façon eslōgnee de toutes pensees charnelles & pollues,nous souuenans de ce qui est dit par l'Apostre , asçauoir,

Que celuy qui adhere au Seigneur est
fait vn esprit avec luy 2.Corin.6.& par le Seigneur:
Que celuy qui est né de l'esprit est esprit
Ieh.3.

Or pour entendre plus specialement la
deduction de ce Cantique , il nous faut scauoir
qu'il est escrit en maniere de dialogue,
y estant introduites plusieurs personnes parlantes
& respondantes les vnes aux autres avec
vn admirable artifice , ascauoir , vne espouse
adressante quelquefois sa parole à d'autres
filles, & vn espoux pareillement accompagné
de ses amys[,] ce que nous voyons aussi
s'observer en la celebration des fiancailles &

[Page 14]

espousailles bien & honnestement reiglees:
L'espouse c'est la compagnie des croyãs, qui
se nomme l'Eglise, representee cōme en vne
seule personne , (comme aussi il est dit, que
les fidelles n'ont qu'un cœur & vne ame Act.
4,32.) en laquelle compagnie toutesfois Salomon
en introduit vne comme parlant au
nom de toute sa suite. Mais oultre cela , veu
la distinctiō qu'il met aucunement entre [ceste-ci]
qui parle cōme Royne & dame, & les
aultres filles de Ierusalem, (suyuant aussi ce
qui en est escrit Pseaume 45) nous pouuons
entendre par ces aultres filles,tant ceulx qui
sont en l'Eglise plustost de nom que deffect,
que ceux qui sont vrayemēt des fideles,mais
sōt encores biē nouueaux,&cōme petis enfans
suyuēt leur mere,qui est cōme vne Royne
suyuie de ses filles & damoiselles. [D'autrepart]
l'espoux cest nostre Seigneur Iesus
Christ,par les amis duquel au traité de ce mariage
nous entendons premierement les esprits
bienheureux desquels Iesus Christ de
tout temps s'est seruy & se sert pour l'edification
de son Eglise, comme il est dit Pseaume
34.& Heb.1.comme aussi toute l'Escriture
nous en monstre les effects:avec lesquels
faut conioindre principalemēt ces excellents
architectes du Temple spirituel de l'Eglise,ascauoir
les Prophetes & Apostres Ephes.2. &
Apoc.21. & consequemment les Pasteurs & docteurs

[Page 15]

docteurs trauaillans fidellement à preparer
ceste sainte Espouse,comme en parle l'Apostre
2.Cor.II. & à l'assemblage des saints,
Ephes.4. Il faut dauantage noter qu'ainsi
qu'au mariage il y a trois degrez,ascauoir en
premier lieu la stipulation, que nous appellons
les fiancailles,durant lesquelles les parties
s'appellent le fiancé & la fiancee: puis la
celebration solennelle du mariage,au iour de
laquelle on les appelle l'Espoux & l'Espouse:
ou le marié,& la mariee: & finalemēt la consommation
du mariage , apres laquelle on
parle de mari & de femme:ainsi en ce mariage
spirituel le fils de Dieu a premierement
comme fiancé son Eglise par la promesse faite
à Adam de sa semence de la femme, laquelle
semence briserait la teste du serpent.
Ce qu'il à puis apres reconfermé à Abraham

Isaac & Jacob. Mais il a encores passé plus auant, quand par l'establissement de la sacrificature Leuitique & autres ombres des promesses euangeliques, (le corps & substance desquelles estoit en Christ Coloss.2) il a comme espousé sa fiancée, mais seulement en absence & comme par procureurs. Voyla pourquoy ceste espouse est premierement introduitte par Salomon, comme rauie en l'attente & desir de la presence reelle & [personnelle] de cest espoux, lequel l'ayant en plusieurs sortes cōsolee & fortifiée par trescertains

[Page 16]

tesmoignages & sa [bienveillance], puis apres se vient rendre iusques à elle, predisant Salomon par cela prophetiquement la manifestation du fils de Dieu en chair & sa conuersation reelle au milieu des siens, mais seulement pour vn petit de temps, remettant l'entiere celebration & consommation de ceste sainte & plus que sainte conionctiō au dernier iour és cieux, alors que Dieu sera tout en tous: 1 Cor. 15. & apparoistra ce qu'est l'Eglise, qui le verra tel qu'il est 1. Ieh. 2. & 3. C'est donc a ceste premiere & seconde iournee actuelle de l'Espoux que cest'Espouse aspire avec vn ardeur merueilleuse suyuant ce qui est dit en S. Matth. 13. chap. & par S. Pierre du desir des anciēns Prophetes 1. Pierre 1. & plus expressement encores par S. Paul, desirāt de desloger pour estre desia avec Iesus Christ. Philipp. 1. comme sont tous les vrais fidelles, demandans en leur priere ordinaire l'auenement de son regne, voire avec gemissements inenarrables Rom. 8. n'oubliant pas cependant Salomon de parler des persecutions qui deuoyēt auenir à l'Eglise, voire par les siens mesmes, & la vocatiō des Gentils, avec les consolations tresfermes & tresexcellentes, l'Espoux entretenant son Espouse par la reiteration de ses trescertains promesses accompagnées de grandes benedictiōs spirituelles, qui sont à son Eglise cōme les arres du

[Page 17]

du second aduenement tresglorieux.

6 Tel est donc le sommaire & le but de ce Cātique, appellé Cantique des Cantiques, & pour son excellēce entre tous les autres contenus en l'Escriture, tāt s'en faut qu'il en doye estre reietté: ou bien dautāt qu'il est comme composé de plusieurs Cantiques, à cause des personnes qui se respondent l'vne à l'autre. Et afin qu'on ne doutast de l'auteur, ou plutost de l'escriuain de ce traitté: il est dit expressement qu'il est de Salomō, Salomon dieu, remply de la sapience de Dieu, & non pas qu'il l'ait composé durant sa folie: en la faute mesme duquel nous nous deurions bien mirer, prians le Seigneur nous faire la grace de profiter [tellemēt en] la lecture de ce S. Cantique, que nous surmontions en cela Salomon mesme, en gardant songneusemēt en nostre cœur ce que Salomon a laissé escouler: sinon que nous disions que sur sa vieillesse (ce qui

se peut aussi recueillir aucunement du liure de l'Ecclesiaste,) il ait eu le don de repentance, combien que l'écriture n'en face aucune expresse mention : & que pour le moins ses idolatries ayent encor duré plusieurs siecles apres luy.

7 Quoy qu'il en soit , sans nous arrester à ce poinct, considerans l'ordre des trois liures de Salomon nous pouuons dire qu'és Prouerbes il a enseigné aux hommes tellemēt la

[Page 18]

vraye conduite de ceste vie , que ça esté d'vne façon familiere & comme vn maistre parlant en vne escole à ses disciples : Puis apres en l'Ecclesiaste il nous a menez cōme du plat pays à vne haute montagne, nous faisant voir d'vn lieu eminent, les diuers destours, par lesquels tous les hommes s'esgarēt, les vns d'vne façō & les autres d'vne autre, monstrāt au trauers de ses labyrinthes quel est le vray chemin pour n'estre surpris de la vanité de ce monde, & pour vser tellement de ceste vie, qu'elle soit le chemin qui nous conduise à la vraye & permanence felicité. Mais finalement en ce Cantique ceux qu'il a ainsi doublement instruits , sont esleuez par lui, cōme iusques par dessus les nues, & comme ravis à la consideration des biens celestes, comme s'ils estoyent desia habitās des cieux : ou pour le moins si desia ils frappoyēt à la porte d'iceux. Ce qui a esté rapporté par quelqu'vn des anciens par allegorie au Temple du Seigneur basti par le mesmes Salomon , auquel il y auoit premieremēt le paruis general du peuple, à quoy on peut cōparer le liure des Prouerbes : puis qu'il y auoit le lieu saint des Sacrificateurs, & finalement le Sanctuaire, appellé le Saint des Saints. Ainsi donc pouuons nous dire que l'Eglise est comme amenée à l'entrée du lieu saint par l'Ecclesiaste, & de la introduite par ce Cantique iusques à estre preste

[Page 19]

preste d'entrer iusques au Sanctuaire apres Iesus Christ son espoux, qui y est entré le premier, pour nous dedier la voye Hebr. 9. & nous y apprester logis , Ieh. 14. auquel suyuant la requeste qu'il a faite pour ceste espouse à Dieu son Pere , elle soit aussi receue en son temps Ieh. 17.

8 Il resteroit maintenant de venir au texte du Cantique , ce que nous ne commencerons pour ceste heure. Auisons de faire nostre profit de ces choses, suppliant celuy qui nous a fait tant de graces de nous auoir introduits en son Eglise hors des pollutions du monde & de tant d'idolatries & superstitions, qu'il nous donne son S. Esprit pour bien contempler & entendre sa sainte doctrine qui nous est enseignee en sa maison pour profiter de plus en plus en la cognoissance & vraye crainte d'iceluy, considerans l'abysme de sa grāde misericorde, en ce qu'au lieu de nous reietter selon nos merites, il luy à pleu nous nettoyer de tant d'ordures pour

nous dedier & consacrer du tout à luy, cōme
vne vierge chaste & pudique, ne contristans
point son S. Esprit de purification, mais au
contraire souffrans qu'il besongne en nous
puissammēt de foy en foy, en attendant sa seconde
venue, qui fera l'accomplissemēt de ce
qu'il nous faut esperer aujourd'huy. Suyuāt
ceste sainte doctrine nous luy demanderōs

[Page 20]

grace & misericorde comme sensuit.

Dieu tout-puissant Pere celeste, nous recognoissons
en nous-mesmes & confessons, comme la
la verité est, que nous ne sommes pas dignes de leuer
les yeux au ciel pour nous presenter deuant ta face:
que nous ne deuons pas tant presumer, que nos oraisons
soyent exaucées de toy, si tu regardes ce qui est
en nous. Car nos consciences nous accusent, & nos pechez
rendent tesmoignage contre nous: & nous sauons
que tu es iuste iuge, qui ne iustifies pas les pecheurs &
iniques: mais punis les fautes de ceux qui ont transgressé
tes saintes commandemens. Ainsi, Seigneur, en
considerant toute nostre vie, nous sommes confus en
nos cœurs, & ne pouuons autre chose, sinon nous abbatre
& desesperer comme si nous estions desia és abysmes
de mort. Toutesfois, Seigneur, puis qu'il t'a
pleu par ta misericorde infinie de nous commander
que nous t'inuoquions, mesme du profond des enfers,
& d'autant plus que nous defaillons en nous-mesmes,
que nous ayons nostre refuge à ta souueraine bonté:
puis aussi que tu nous a promis de recevoir nos requestes,
& supplications, nō point en considerant quelle
est nostre dignité, mais au Nom & par le merite de
nostre Seigneur Iesus Christ, lequel tu nous as cōstitué
intercesseur & aduocat: renonçant à toute fiance humaine,
nous prenons hardiesse en ta seule bonté, pour
nous adresser deuant toy, & inuoquer ton saint Nom,
pour obtenir misericorde.

Premierement, Seigneur, outre les benefices infinis
que tu distribues communément à tous hommes de la
terre, tu nous as fait tant de graces speciales, qu'il nous
est impossible de les reciter, ne mesme suffisamment
comprendre.

Singulierement qu'il t'a pleu nous appeller à la cognoissance
de son saint Euangile, nous retirans de la
miserable seruitude du diable, où nous estions, nous nous

[Page 21]

nous deliurant de la maudite idolatrie, & des superstitions,
où nous estions plongez, pour nous conduire
en la lumiere de ta verité. Et neantmoins, par ingratitude
& mescognoissance, ayans oublié les biens que
nous auons receus de ta main, nous auōs decliné, nous
destournans de toy apres nos concupiscences, & n'auōs
pas rendu l'honneur ne l'obeissance à ta sainte Parole
telle que nous deuōs: nous ne t'auōs point exalté & magnifié
comme il appartenoit: & combien que tu nous
ayes tousiours fidelement admonestez par ta Parole,
nous n'auons point escouté tes remonstrances, nous auons
donc peché, Seigneur, nous t'auons offensé, pourtant
nous receuons confusion sur nous & ignominie,
recognoissans que nous sommes grieuement coupables
deuant ton iugement: & que si tu nous voulois
traiter selon que nous en sommes dignes, que nous ne
pouuons attendre que mort & damnation. Car quand

nous voudrions nous excuser , nostre conscience nous accuse,& nostre iniquité est deuât toy pour nous condamner. Et de fait , Seigneur, nous voyons comment par les chastimens , qui nous sont desia aduenus , tu as esté à bon droit courroucé contre nous. Car puis que tu es iuste & equitable , ce n'est pas sans cause que tu afliges les tiens. Ayans donc esté batus de tes verges, nous recognoissons que t'avons irrité à l'encontre de nous. Et maintenant nous voyons encores ta main leuee pour nous punir : car les glaiues dont tu as accoutusmé d'executer ta vengeance , sont maintenant desployez, & les menaces que tu fais contre les pecheurs & iniques, sont toutes appareillées.

Or quand tu nous punirois beaucoup plus rigoureusement que tu n'as fait iusques à ceste heure, & que pour vne playe nous aurions à en receuoir cent , mesme que les maledictiõs desquelles tu as autresfois corrigé les fautes de ton peuple d'Israel, tomberoyent sur nous , nous confessons que ce seroit à bon droit , & ne contredisons pas que nous ne l'ayons bien merité.
[Page 22]

Toutesfois , Seigneur , tu es nostre Pere , & nous ne sommes que terre & fange : tu es nostre Createur, & nous sommes les œuvres de tes mains: tu es nostre Pasteur, nous sommes ton troupeau: tu es nostre redempteur, nous sommes le peuple que tu as racheté: tu es nostre Dieu, nous sommes ton heritage. Parquoy ne te courrouce point contre nous , pour nous corriger en ta fureur. Que tu n'ayes point memoire de nostre iniquité, pour la punir, mais chastie nous doucement en ta benignité. Pour nos demerites tõ ire est enflamnee, mais qu'il te souuienne que ton Nom est inuoqué sur nous , & que nous portons ta marque & ton enseigne. Entretiẽ plusost l'œuvre que tu as commencee en nous par ta grace , à fin que toute la terre cognoisse que tu es nostre Dieu & Sauueur. Tu sais que les morts qui sont és enfers,& ceux que tu auras desfaits & confondus , ne te loueront point : mais les ames tristes & desolees,les cœurs abbatu,les consciences oppressees du sentiment de leur mal , & affamees du desir de ta grace,te donnerõt gloire & louange. Ton peuple d'Israël t'a prouqué à ire plusieurs fois par son iniquité, & tu l'as affligé par ton iuste iugement : mais quand il s'est reduit à toy,tu l'as tousiours receu à pitié.Et quelques grieues que fussent ses offenses , pour l'amour de ton alliance que tu auois faite avec tes seruiteurs Abraham, Isaac & Iacob,tu as destourné tes verges & maledictions, lesquelles leur estoient preparees,tellemêt que leurs oraisons n'ont esté iamais repoussees de toy. Nous auons par ta grace vne alliance beaucoup meilleure , que nous te pouuons alleguer : c'est celle que tu nous as faite , & establie en la main de Iesus Christ nostre Sauueur,laquelle tu as voulu estre escrite de son sang,& ratifiee par sa mort & passion. Pourtant,Seigneur renonçans à nous-mesmes,& à toute fiance humaine, nous recourons à ceste Alliance bien-heureuse, par laquelle nostre Seigneur Iesus t'offrât son corps en sacrifice, nous a reconciliez à toy. Regarde donc, Seigneur,
[Page 23]

Seigneur , en la face de ton Christ,& non pas en nous? à fin que par son intercession ton ire soi appaisee, & que ton visage reluise sur nous en ioye & en salut : & d'oresenauant vueilles nous receuoir en ta sainte conduite,& nous gouverner par ton Esprit , qui nous

regenere en vne meilleure vie , par laquelle ‘Ton nom soit sanctifié. Ton regne aduiene. Ta volonté soit faite en la terre comme au ciel. Donne-nous aujourd'hui nostre pain quotidien. Et nous pardonne nos offenses , comme nous pardonnons à ceux qui nous ont offencez. Et ne nous indui point en tentation: mais deliure nous du malin. Car à toy est le regne,la puissance,la gloire és siecles des siecles,Amen’.

Et combien que nous ne soyons pas dignes d'ouuir la bouche pour nous-mesmes , & pour te requérir en nostre necessité : neantmoins puis qu'il t'a pleu nous commander de prier les vns pour les autres, nous te prions pour tous nos poures freres & membres , lesquels tu visites de tes verges & chastimens: te suppliâs de destourner ton ire d'eux, nommémêt pour N.& N. Qu'il te souuiene,Seigneur qu'ils sont tes enfans comme nous,& s'ils t'ont offensé,que tu ne laisses point de poursuyure sur eux ta bonté & misericorde , laquelle tu as promise deuoir estre perpetuelle enuers tous tes fideles. Vueilles donc regarder en pitié toutes tes Eglises, & tous les peuples que tu as maintenât affligez, ou par peste,ou par guerre,ou par famine : les personnes batues de tes verges,soit de maladie,prison ou poureté , les consolant tous , selon que tu cognois qu'ils en ont besoin,& en leur faisant profiter tes chastimens à leur correction, les confermer en bonne patience & moderer ta rigueur : & en la fin, en les deliurant, leur donner pleine matiere de se resiouer en ta bonté , & benir ton saint Nom. Singulierement qu'il te plaise d'auoir l'œil, sur ceux qui trauaillent pour la querelle de ta verité, tant en general qu'en particulier , pour les confermer en constance inuincible , les defendre, leur assister en tout & par tout , renuersant toutes les

[Page 24]

pratiques & complots de leurs ennemis & les tiens,tenant leur rage bridee , les rendant confus en l'audace qu'ils entreprenent contre toy & les membres de ton Fils. Et ne permets que la Chrestienté soit du tout desolee, ne permets que la memoire de ton Nom soit abolie en terre: ne permets que ceux sur lesquels tu as voulu ton Nom estre inuoqué perissent: & que les Turcs,Payens,Papistes, & autres infideles se glorifient en te blasphemant.

Nous te prions aussi , Pere celeste, pour tous Princes & Seigneurs tes seruiteurs , ausquels tu as commis le regime de ta iustice , & singulierement pour les Seigneurs de ceste cité , qu'il te plaise leur communiquer ton Esprit seul bon & vrayement principal,iournellement leur augmente tellement que recognoissans en vraye foy Iesus Christ ton Fils nostre Seigneur estre le Roy des rois,& Seigneur sur tous seigneurs,comme tu luy a donné toute puissance au ciel & en la terre , ils cherchent de le seruir & exalter son regne en leur domination: gouvernât leurs sujets, qui sont les creatures de tes mains,& brebis de ta pasture,selō ton bon plaisir: à fin que tât ici que part toute la terre,estâs maintenus en bonne paix,nous te seruions en toute sainteté & hōnesteté:& estans deliurez de la crainte de nos ennemis, te puissions rendre loüange en toute nostre vie.

Aussi nous te prions,Pere veritable & Sauueur,pour tous ceux que tu as ordonnez Pasteurs à tes fideles,& ausquels tu as commis la charge des ames,& la dispensation de ton sacré Euangile : que tu les conduises par ton S.Esprit,à fin qu'ils soyent trouuez fideles & loyaux Ministres de ta gloire,ayans tousiours ce but, que toutes les pures ouailles esgarees soyent recueillies & reduites au Seigneur Iesus Christ , principal Pasteur & prince des Euesques : à fin que de iour en iour elles

profitent & accroissent en luy à toute iustice & sainteté.
 D'autrepart vueilles deliurer toutes tes Eglises
 de la gueule des loups rauissans, & de tous mercenaires, res.

[Page 25]

qui cherchent leur ambition ou profit, & non point
 l'exaltation de ton saint Nom tant seulement, & le
 salut de ton troupeau.

Après nous te prions, Dieu tres-benin & Pere misericordieux ,
 pour tous hommes generalement : que
 comme tu veux estre reconnu Sauueur de tout le mōde,
 en la redemption faite par ton fils Iesus Christ, que
 ceux qui sont encore estranges de sa cognoissance , estans
 en tenebres & captiuité d'erreur & ignorāce, par
 l'illumination de ton S.Esprit, & la predication de ton
 Euāgile, soyēt reduits à la droite voye de salut: qui est
 de te cognoistre seul vray Dieu, & celuy que tu as enuoyé
 Iesus Christ. Que ceux qu tu as desia visitez par
 ta grace, & illuminez par la cognoissance de ta Parole,
 croissēt iournellemēt en bien, estās enrichis de tes benedictiōs
 spirituelles, à fin que tous ensēble t'adorions
 d'vn cœur & d'vne bouche, & dōnions hōneur & hommage
 à ton Christ nostre Maistre, Roy & Legislatteur.

Nous le prions aussi qu'il luy plaise nous augmenter
 la foy , dont nous faisons confession de cœur & de
 bouche[,]en disant,

'Je croy en Dieu le pere tout-puissant, createur du ciel & de la terre. Et en Iesus Christ son seul fils, nostre Seigneur:
 qui a esté conçu du S.Esprit: est nay de la vierge Marie: a souffert sous Ponce Pilate: a esté crucifié, mort &
 enseveli: est descendu és enfers : le troisieme iour est resuscité des morts: est monté au Ciel: est assis à la dextre
 de Dieu le pere tout puissant , & de là viendra iuger les viuans & les morts. Je croy au S.Esprit. Je croy l'Eglise
 uniuerselle, la communion des saints: la remission des pechez: la resurrection de la chair: la vie eternelle. Amen'.

Ici le pseume ordonné se chante, & icelui acheué, le
 ministre congediant l'Eglise , adiouste ceste benediction,
 prinse des Nomb.6.

'Le Seigneur vous benie & vous conserue. Le Seigneur face luire sa face sur vous, & vous soit propice. Le
 Seigneur tourne son visage vers vous , & vous maintiene en bonne prosperité, Amen'.